

pararahan za ruma'

a aidan ziya, nu maranger ta parahan za ruma' mu, karuwa sa'ami nu penadang ta. mukuwa ta ziya i zenan miya'a za kawi za taturakan, za vavarata(puwalrepus). nu atrevung ta mu, ta puzungay. zi marepadaulr ta za niruma'enan mukuwa meteka. nu adalrep lra mu, ta kasayasayayaw pakezeng za hung. nu adawilr mu, ta palra'uzanay kana 'enay(zanum). nu vetriliyan mu, makiteng na 'enay(zanum) i zinanuman. zi maruwa ta palra'uz za kawi zi za 'uway.

nu kurikazukazu lra ta pinadang na pararahanan na eman ziya mu, demaulr ta za ma'inayan i zekalr. kipuwalrang ta parahan za ruma'. na vavayan mu, mukuwa kiyalavuna, mukuwa penadanga zatu aekanan zi tratrekelan kana kiyakarun. nu semasa'uv ta lra mu, sazekalran zuwa puwalranga. ulra na trematrekav za vasikaw, ulra na venavetu' kana lavun, ulra na tematuluz za 'uway, salaw misa'ur na niruma'enan.

piya ta sema'uv mu, meliveng ta kana sinasedesede'an. ulra a kiya'izengan, ulra a sawka, ulra a suru, ulra a kuvaw zi a pupalizingan.

a azu ziya mu, miliveng ta kana tinulikan na vasikaw. na vasikaw mu, ta patre'elray za lavun i makapatraran. likuzan lra mu, tu tra'i kana hung na vekavekal ziya, na tinevtevan na daramiyan. zi na zalekitr na dare' mu, ta pu'enayay(puzanumay) zi ta inu'aw. ta zeliyanay kana vasikaw na liveng. salaw arekez zi 'azi makaud za 'udalr.

nu pararahan ta za ruma' mu, amelri tu kezung kana miyaruma'. tu nilimayan tu kezung za sazekalran. nu i eman na pararahan za ruma' kema ta mu, karadikedikes, karapuwalraalrang na sazekalran. ziiyanay zi, nu muwasavak ta za vekalan za ruma' mu, semasaharan na sazekalran zi maresaur na ma'a'izangan. pakasemangal zi semungal za temuwamuwan.

nu parahan ta za ruma' harem mu, salaw ta kalre'ayan. ta pakarunay na kosi na mitrepa parahan za ruma'. zi tu parahananay ta za ruma' za arekez zi za vulay. ta putrima'ay lra za paisu. muasaasalr lra a kakuwayanan harem. salaw ta sare'ez kananta kakuwayanan na pararahanan za ruma' a aziyu ziya.

蓋住屋

早期蓋房子，要花一年的時間備料、砍伐、搬運。備齊後，通知部落的人幫忙蓋房子、割茅草、準備食物、飲料，有的削竹片、束綁茅草、遞藤條。早期，牆壁是用竹片交叉架起來的，外面再覆蓋茅草。後來用牛糞、稻草、黏土加水混合成泥狀，砌在竹牆。蓋住屋是整個部落族人共同完成，新屋落成時，整個族人齊歡慶，耆老吟唱古謠謝祖庇佑及賜福，並分享喜悅。

現在蓋房子交由建設公司建蓋，習俗也隨時代在變，很懷念從前蓋住屋的情景。